

Atuarfik pillugu Inatsisartut inatsisaat nr. 15, 3. december 2012-imeersumi § 25, imm. 4-imi aamma § 36, imm. 1-imi aalajangersarneqartut naapertorlugit meeqqanut inuusuttunullu inerikkiartornermikkut kingusissunut nerisaqarfigiutigalugu atuarfittut immikkut ilusiligaasumik suli ataatsimik pilersitseqqullugit ingerlatseqqullugillu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Agathe Fontain, Inuit Ataqatigiit)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Aappassaaneerinnineq

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap ullormut oqaluuserisassamik sukumiisumik suliarinninnera pillugu Naalakkersuisut qutsavigaat, aammattaaq naleqquttumik siumullu isigaluni allannguutissatut siunnersuummik ataatsimiititaliap saqqummiineranut Naalakkersuisut qutsavigaat, tassani misissueqqissaarnissamik inerikkiartornermikkut kingusissut atuarfimmi ilinniagaqarnissamullu periarfissaat pillugit aalajangiinissamut pitsaanerusementik tunngavissiorinissamut Naalakkersuisut piffissalernerqarlutik periarfissineqarlutillu.

Meeqqat atuarfiannik peqataatitsilluni atuartitsisarniarluni aaqqissuunneqarnissaata misissueqqissaarnermi ilanngunneqarnissaannik ataatsimiititaliap inassuteqarnera Naalakkersuisut immikkut nuannaarutigaat aammalu meeqqanut inuusuttunullu inerikkiartornermikkut kingusissunut nerisaqarfiutigisuni atuarfinnik immikkut aaqqissuussamik pilersitsinissamik pisariaqartitsineq misissorneqassalluni.

Ataatsimiititaliap isumaliutissiissummini oqaatigaa innarluutilinnut nerisaqarfiutigisumik atuarfiup, Ado Lyngep Atuarfiata, illutaa pisoqaasoq tamarmi iluarsaanneqartariaqartoq illumilluunniit nutaarluinnarmik pisariaqartitsisoqartoq. Naalakkersuisut tassunga atatillugu ilisimatitsissutigissavaat Ado Lyngep Atuarfiata aaqqissuunnaa aasaq manna atuartut kingulliit atuangiffeqalerpata aallartinneqassasoq. Ilimagineqarpoq iluarsaassineq ukiamut atuarnep aallartinnginnerani naammassissasoq.

Naalakkersuisut aammattaaq ilisimatitsissutigissavaat inuit immikkut pisariaqartitsisut immikkut aaqqissuussamik ilinniarnissaasa pilersinneqarnissaanut inatsisitigut tunngavissiorinissaq siunertaralugu inatsisissamut piareersaaneq piaarnerpaamik aallartinneqassasoq. Ilimagineqarpoq suliaq taanna 2015-imi naammassissasoq.

Naalakkersuisut taamatut naatsumik oqaaseqarlutik allannguutissatut siunnersuutip akuerineqarnissaa inassuteqaatigaat.